

弘

簡

錄

弘簡錄卷之七

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之十

順宗皇帝諱誦德宗長子母昭德王皇后以上元二年正月生於長安之東內初封宜王立爲皇太子留心藝術善書德宗上爲詩每賜大臣方鎮必命書之性寬仁有斷禮重師傅輒先排非從幸奉天賊泚逼迫常身先禁旅乘城拒戰督勵將士無不奮激德宗在位久稍不假宰相權左右倖臣因間用事刻下取功排陷陸贄張滂輩人不敢言從容論爭故卒不任延齡舉卒爲相常侍宴魚藻宮張水嬉綵艦雕靡宮人引首爲權歌絲竹發德宗歡甚復引詩人好樂無荒爲對每數奏必正言未嘗

假宦官近侍顏色居儲極二十年天下陰受其賜父皇不豫親
王諸戚皆侍獨因感疾不至德宗思見太子涕咽悲嘆疾益增
劇凡二十餘日中外不通莫知兩宮安否人情震懼臨崩舍卒
名翰林學士鄭綱衛次公等至金鑾殿草遺詔時宦官在內議
所立尚未定次公遽言太子雖有疾地居冢嫡中外屬心必不
得已猶應立廣陵王不然必亂綱等從而和之議始定太子知
人情憂疑力疾出九仙門紫衣麻履召見諸軍使人心粗安甲
午遷柩太極殿宣遺詔發喪始縗服以見百官丙申卽皇帝位
衛士尚疑引領望見乃喜時已失音不能決事權居宮中施廉
帷獨宦者李忠言昭容牛氏侍左右百官奏事自惟中可之先
是上在東宮翰林待詔王係王叔文出入娛侍大獲愛幸及是
潛入依附忠言與昭容稱詔行下外無知者密結韋執誼陸淳

呂溫李景儉韓聘韓太陳諫柳宗元劉禹錫凌準程昇房啓定
爲死友庚子羣臣請聽政二月癸卯朝百官于紫宸門甲辰以
河陽三城行軍司馬元韶爲懷州刺史兼節度使丙午罷翰林
醫與相工占星射覆等類己酉張茂昭加平章事辛卯叔文引
韋執誼爲右丞同平章事與己中外相應專擅國事辛酉貶李
實通州長史王權代爲京尹甲寅命釋故時平涼劫盟嚴懷志
呂溫等一十六人賜日本國王并妻還國禮物壬寅係與叔文
並充翰林學士朝廷每事先下叔文可否然後宣於中書執誼
承而行之甲子大赦罷諸道進奉鹽鐵月進并宮市五坊小兒
之類兩稅除正額外一切禁斷痛革德宗晚年刻薄待下之弊
追還鄭餘慶韓皋等於京師三月庚午出宮女三百掖廷教坊
女樂六百悉召親族歸之戊寅加韋皋太尉李師古侍中劉濟

司空張茂昭司徒吳少誠同平章事丙戌以杜佑領諸道度支
鹽鐵使叔文爲副使專總利權冊拜賈耽司空鄭珣吏部尚
書高郢刑部尚書韋執誼中書侍郎王士真王錡田季安皆檢
校司空癸巳冊廣陵郡王淳爲皇太子改名純夏四月壬寅封
皇弟諤欽王誠珍王又別賜皇子名經鄭王緯均王縱澈王紆
莒王綱密王約郁王結宋王緡集王綵冀王綺和王絢衡王緄
會王綰福王紘撫王緄岳王紳袁王綸桂王禪翼王戊申陸淳
崔樞並爲太子侍讀庚戌封太子男寧寬宥察震察等六人爲
郡王並食邑三千戶丙寅罷萬安監收賜徐州節度名武寧軍
戊辰起鄧餘慶爲左丞韓臯爲右丞充鄂岳沔都團練觀察
使五月己巳以范希朝爲右神策統軍充京西諸城鎮行營兵
馬使韓太爲行軍司馬諸軍皆不赴甲辰進昭容牛氏修儀丁

亥昇襄州爲大都督府徙臨漢縣于鄧城辛卯俱文珍等惡叔
文專權以爲戶部侍郎削去翰林之職叔文始懼六月己亥宣
欽巡官羊士諤以論叔文等之非貶爲汀州寧化尉秋七月戊
辰朔吐蕃論悉諾來朝貢丙子加故陸贄贈諡故陽城贈官丙
戌關東蝗癸巳程懷信卒起復子執恭領任韋皋上表請權令
皇太子親監庶政又合荆南裴均河東嚴綬上箋皇太子皆指
三監撓政爲言乙未詔自今軍國政事宜令皇太子勾當時叔
文有母喪執誼王伾失據日請起復爲相不獲其意皆憂懼不
自保俱文珍引杜黃裳爲門下侍郎袁滋爲中書侍郎並同平
章事罷鄭珣瑜高郢丙申皇太子見百寮於朝堂奏事麟德殿
西亭百官拜賀太子不答八月庚子詔禪皇太子位朕稱太上
皇居典慶宮改制爲誥以今月九日冊皇帝於宣政殿改是年

爲永貞元年尊良娣王氏爲太上皇后良媛董氏爲德妃王實
貶王任開州司馬叔文渝州司戶前後賜死

開日夜匪患幽祗懼其長擔捨橫孽見覘復光嗟嗟永貞
信宿爲殃元和繼統賴及遐方

天王 唐一之十一

憲宗皇帝諱純順宗長子母莊憲王太后以大曆十三年二月
生于長安之東內稍長德宗抱置膝上問是誰對曰是第三天
子大奇異之貞元四年封廣陵王永貞元年冊爲皇太子權勾
當軍國政事八月乙巳卽皇帝位先是連月霖雨登祚之辰天
日晴霽人情忻悅丙午昇平公主進女口却之丁未御紫宸殿
見百寮庚戌荆南獻毛龜詔曰朕所寶惟賢至如嘉禾神芝奇
禽異獸王化虛美並宜停進已後凡有祥瑞但令申報有司不

得上聞癸丑韋臯劉闢據蜀都要求節鉞上憤先朝威福不
振方鎮自專不許命宰相袁滋安撫癸亥鄭餘慶復相九月丁
卯上德宗諡已巳罷授教坊樂人正員官丙子賑申光蔡陳許
兩道旱饑已卯貶韓泰等先爲諸州刺史韋執誼崖州司馬壬
午伊慎來朝上在藩邸聞韓全義澠水之敗不覲而還心常惡
之辛卯全義懼請入朝冬十月丁酉發曾祖母太皇太后沈氏
哀於肅章門外諡曰睿真戊戌徵劉闢爲給事中就命袁滋代
領其任闢不受徵阻兵自守滋不敢進貶吉州刺史韓全義致
仕其甥楊惠琳自知留後朝命代以左驍衛將軍李演惠琳據
城叛詔發天德河東兵討之庚子南詔吐蕃咸賻山陵已酉葬
崇陵乙巳睿真皇后德宗皇帝神主各祔太廟已卯再貶韓太
等七人爲州司馬十二月壬寅改州縣名犯上諱者淳州爲蠻

州還淳縣爲清溪淳風縣爲從化純化縣爲慕化純義縣爲正義姓淳于者省姓于已酉上以新卽位未遑致討復除劉闢成都尹職使如故庚戌析金州漢陰置石泉縣壬子右諫議大夫韋丹上書請討劉闢擢爲梓州刺史劔南東川節度使壬戌拜鄭絪中書侍郎同平章事上讀列聖實錄見貞觀開元故事殊慕不能釋卷自是延英議政晝漏下五六刻方退悉以軍國樞機歸之宰相中外拭目以觀中興之政

元和元年春正月丙寅朔帝幸羣臣朝興慶宮奉上太上皇尊號曰應乾聖壽太上皇帝丁卯御含元殿受朝大赦改元是月十六日已後太上皇愆和親侍藥膳權罷聽政甲申太上皇崩于興慶宮咸寧殿年四十六乙酉遷殯于太極殿發喪以杜佑攝冢宰杜黃裳爲禮儀使伊慎大明宮留守時劉闢已得旌節

志益驕更求兼領三川上不許乃發兵反攻圍梓州杜黃裳勸
上以軍事委高崇文勿置監軍戊子下制討闕拜崇文檢校工
部尚書充神策行營節度使令興元嚴礪東川李康倚角應接
辛卯羣臣請聽政二月乙未朔以度支郎中寬敬爲行營糧料
使劉闢陷梓州執李康丁酉嚴礪拔劔州斬僞刺史文德昭辛
丑奚王梅落可來朝甲辰以錢少禁用銅器戊戌上問宰臣前
代帝王或怠於聽政或躬決繁務其道如何黃裳對以帝王大
要必務綱領其患在於不能推誠任人是以傳稱帝舜之德惟
曰恭己無爲至如簿書獄訟本非人主所自任苟得其要何患
不理上稱善三月丙寅崇文引兵自閬趨梓闕將邢泚遁去崇
文入屯梓州闕歸李康以求自雪崇文數其敗軍失守斬之丙
子嚴礪克梓州丁丑削闕官爵辛巳夏州兵馬使張承金斬惠

琳首以獻朝命李愿充夏綏節度使壬辰韋丹表言崇文客軍遠鬪無所資賴請讓梓州以綴士心夏四月丁酉改崇文檢校兵部尚書梓州刺史劔南東川節度使丙午先朝所徵制舉上不忍親試命宰臣監試於尚書省得元稹白居易獨孤郁蕭俛沈傳師數人以爲校書郎御史拾遺等官丁未卅拜杜佑司徒令兵部侍郎李巽代領度支鹽鐵等使壬戌武元衡奏復正衙奏事仍詔尚書省六品以上東宮師傅賓詹等官每延英坐日令兩人候對五月丁卯元稹請復太宗故事遇三品以上大臣入議大政隨以諫官一人參論得失又宜早擇修正之士使輔導王子上嘉納庚辰鄭餘慶罷辛卯卅太上皇后王氏爲皇太后后六月丁酉崇文八戰皆捷破萬人於鹿頭關賊移關萬勝堆遣驍將高霞寓攻奪之庚子又破德陽癸卯拔漢州嚴礪將嚴

秦破綿州石牌谷閏月乙卯率羣臣上尊諡曰至德大聖大安
孝皇帝廟號順宗壬午去諫議大夫左右字仍舊四員以前司
封韋况爲之甲申吐蕃論勃藏來朝貢秋七月癸巳崇文大破
闢衆於玄武詔封渤海郡王西川兵悉取處分八月丁卯封皇
子寧鄧王寬澧王宥遂王察深王寰洋王察絳王審建王壬申
葬豐陵乙亥冊貴妃郭氏九月壬寅崇文進兵闢將仇良輔并
卒萬人皆降獲闢壻蘇疆長驅直指成都辛亥克之入城軍於
通衢闢與盧文若奔吐蕃遣霞寓等追及文若自殺闢就擒檻
送京師斬邢泚并館驛巡官沈衍餘無所問辛亥宰相入賀上
曰杜黃裳曰卿之力也丙寅拜崇文司空成都尹劍南西川節
度兼統押近界諸蠻及西山八國雲南安撫等使改封南平郡
王食邑三千戶戊戌以巖礪爲劍南東川節度使將作監柳晟

山南西道節度使戊子劉闢伏誅十一月丙辰內長侍吐突承
瓘爲神策護軍中尉十二月回鶻入貢與摩尼偕來

二年春正月己丑朔朝獻太清宮太廟辛卯圓丘大赦丁酉杜
佑請謝政每月三度入朝商量政事庚子從廻紇請于河南太
原建摩尼寺乙巳杜黃裳罷己卯武元衡爲門下侍郎李吉甫
中書侍郎並同平章事丁巳停中和重陽二節惟上巳賜宴二
月辛酉詔僧尼道士隸左右街功德使祠部司封不復闕奏丙
寅停左右羽林軍應管月番飛騎并近置英武軍額己巳停次
對官自今有事狀聞庚午賜司天新造曆名元和觀象曆丁丑
寒食節宴羣臣於麟德殿三月癸卯加李異兵部尚書夏四月
甲子上思革邊將舊弊命范希朝爲朔方靈鹽節度使以右神
策鹽州定遠兵隸焉庚辰趙昌進瓊官儋振萬安六州六十二

洞鑿降圖六月丁巳朔始置百官待漏院於建福門外各按班
品丙子新築左神策軍夾城辛巳置玄化門神耀樓秋七月丙
戌朔勅刑部許孟容等刪定開元格後勅戊子錄功臣蘇瓌孫
繫爲京府司錄崔玄暉孫元方張說孫旆並監察御史狄仁傑
桓彥範孫爲右拾遺敬暉孫元亮袁恕已孫德師相次敘用癸
巳太僕丞令狐丕進亡父恒所撰代宗實錄詔贈工部尚書八
月辛酉武元衡兼判戶部事甲子命職方員外郎王潔嶺南選
補御史崔元方監之辛巳封杜黃裳邠國公于頔燕國公十月
巳酉李錡反殺判官王澹大將趙琦壬戌詔削官爵命淮南王
諤充諸道行營招討處置使內官薛尚衍爲都監往討之高崇
文屢上表稱蜀中安逸無所陳力願及其未老效死邊陲上擇
可以代之者丁卯以武元衡代領其任將行御安福門遣之鎮

海軍兵馬使張子良與牙將裴行立等共擒李錡械送京師伏
誅乙亥羣臣入賀十一月丙戌論功拜張子良檢校工部尚書
左金吾衛將軍封南陽郡王賜名奉國田少卿李奉僊檢校左
右常侍左右羽林將軍代邠二國公裴行立泌州刺史贈王澹
給事趙錡和州刺史崔善貞睦州刺史甲辰詔杜佑每日中書
視事事或未當與同列極論不可一二遂止十二月甲寅封李
吉甫贊皇侯丁巳拜崇文檢校司空同平章事邠寧慶節度使
充京西諸軍都統壬申罷禮部試舉人口義試墨義十條五經
通六卽放進士己卯吉甫上元和國計簿總計天下方鎮凡四
十八管州府二百九十五縣一千四百五十三戶二百四十四
萬二百五十四其鳳翔鄜坊邠寧振武涇原銀夏靈鹽河東易
定魏博鎮冀范陽滄景淮西淄青十五道凡七十一州不申戶

口每歲賦入倚辦止於浙江東西宣歙淮南江西鄂岳福建湖南等八道合四十九州一百四十四萬戶比量天寶四分有一天下兵戎仰給縣官八十三萬餘人比量天寶三分加一幸以三分勞筋苦力之人奉七分坐衣待食之輩其他水旱所損徵科發斂又在常役之外中書奏諸道祥瑞皆緣獻享告廟元會奏聞請依令式從之

三年春正月癸巳羣臣上尊號曰睿聖文武皇帝御宣政殿受冊大赦禁長史詣闕進奉戊申罷左右神威軍合爲一號天威軍三月乙巳御宣政殿試制科舉人夏四月壬申大風毀含元殿欄檻五月一日罷御殿受賀壬辰復行武舉六月癸亥蠻酋黃少卿歸欵授歸順州刺史弟少高少溫並受官丁丑范希朝奏沙陀突厥朱邪盡忠與其子執宜謀歸唐爲吐蕃所迫盡忠

戰死其弟葛勒阿波率衆詣靈州降詔置陰山府拜阿波都督
執宜兵馬使秋七月辛巳朔日食九月己丑王鏐來朝丙申李
吉甫罷裴垕入相上寵信彌篤嘗問以治理之要對曰先正其
心戊戌杜黃裳卒十一月甲午程執恭來朝十二月庚戌建臨
涇縣爲行原州命鎮將郝北爲刺史自是西戎不敢犯塞甲子
南詔異牟尋卒子蒙閣勅立遣使弔祭

四年春正月庚寅南方旱饑命左司郎中鄭敬德等爲江淮兩
浙荆湖襄諸道宣慰使以賑恤之二月丁卯鄭綱罷李藩爲門
下侍郎同平章事三月乙酉王士真卒子承宗自爲留後上思
革河北諸鎮世襲之弊欲自朝廷除授不聽則典師討伐大臣
皆言未可內侍吐突承璀獨希上意自請將兵盧從史亦以未
得朝命因承璀併說請發本軍往討承宗上皆從之閏月不雨

自去冬至此學士李絳白居易請釋繫囚蠲租稅放宮人絕橫
斂禁賣良人爲奴婢己未乃兩絳表賀丁卯立長子鄧王爲皇
太子夏四月壬午裴均違勅進銀器上以付左藏庫旣而諭進
奏院自今諸道進奉無得申御史臺有訪問者輒以名聞六月
丁丑朝議靈武迫近吐蕃恐沙陀反覆命轉范希朝爲太原尹
選其驍勇號沙陀軍其餘衆遠徙定襄州秋七月乙巳朔上出
御製前代君臣事跡十四篇書於屏風以示宰臣李藩等上表
稱謝八月丙申安南都護張舟奏破環王國獲王子并戰象以
獻癸卯以裴冕配享代宗廟庭李晟段秀實配享德宗廟庭九
月庚戌起復承宗領節度使以所獻德棣二州建爲保信軍就
命德州刺史薛昌朝充觀察使承宗襲執昌朝冬十月癸未上
怒遂命承瓘爲鎮州行營招討處置等使龍武將軍趙萬敵爲

神策先鋒內官宋惟澄曹進玉馬朝江等爲行營館驛糧料等使許謚容獨孤郁面論征伐大事不可以內官爲帥詔改處置爲宣尉猶存招討使名己丑詔削承宗官爵其武俊士真墳墓勿得輒犯士平士則各守本官叢封邑己亥承璀軍發京師上御通化門勞遣十一月己巳吳少誠卒命遂王宥遙領彰義軍節度使而用其將吳少陽爲留後十二月壬申朔丙季安恐伐趙後魏亦危乃厚犒王師悉甲歷境名取堂陽而還

五年春正月盧龍將劉濟引兵擊拔饒陽束鹿丁卯承璀至行營與戰輒敗軍中奪氣三月白居易上言河北用兵四害須速解罷上納之夏四月庚午朔盧從史與承宗通謀過留不進遣牙將王翊元奏事裴垺得其都知兵馬使烏重胤等款要入言於上請以討除之甲申承璀與行營兵馬使李聽謀執從史械

送京師丁亥范希朝張茂昭大破賊於木刀溝五月乙巳昭義軍潰奔魏州庚申吐蕃論思卽熱朝貢六月戊寅奚迴紇室韋寇振武軍秋七月庚子承宗上表自首乞輸常賦請官吏丁未詔雪其罪仍復官爵悉罷諸道兵加劉濟中書令田季安司徒李師道僕射乙卯濟次子總毒殺其父并兄緄自領軍務八月乙亥上顧問神仙之事宰臣李藩對曰神仙之說多出於後代好怪之流依附假託往往人主受禍卒無明驗君人者但務求理四海社稷延承自然長年上深然之九月辛亥承瓘自行營還諫官段平仲呂元膺請行朝典上宥之降爲軍器使壬戌起復劉總領節度使癸亥裴均病以權德輿守禮部尚書同平章事冬十月庚辰均進德宗實錄賜錦綵銀器史官蔣武韋處厚等頒賜有差辛巳張茂昭入朝請代上以左庶子任廸簡爲

行軍司馬州將楊伯玉誘三軍爲亂別將張佐元殺之軍中懼復殺佐元乃以迪簡充義武軍節度使甲午改茂昭爲河中尹十一月庚子伊慎行賂與中尉第五從直求河中事泄降右衛將軍壬寅賜阿跌光進姓李氏以爲單于大都護丙寅吏部郎中柳公綽獻大醫箴上喜納遣中使撫勞

六年春正月甲辰勅諫議大夫孟簡給事中劉伯芻工部侍郎歸登右補闕蕭俛等於豐泉寺翻譯大乘本生心地觀音經庚申李吉甫復知政事丁卯罷李藩爲太子詹事二月丙子罷李絳爲戶部侍郎以不進羨餘上益重之夏四月戊辰罷裴垣爲太子賓客庚午盧坦奏經度振武天德營田凡經四年開墾四千八百頃收穀四千餘萬斛歲省度支錢二十餘萬緡王播奏元和五年江淮河嶺兗鄆等鹽院除收買鹽價錢計贏一千七

百四十六萬三千七百貫並付度支收管五月庚子左金吾簡將軍李惟簡爲鳳翔尹增墾田數十萬畝屬歲屢稔公私有餘六月丁卯李吉甫奏本朝設官凡給內外俸料不下萬員有特出異名府寺曠廢因循不改復值艱難增置使額至今名存職廢額去俸存加以設官有限入流無窮請勅下諸司錯綜利病詳定廢置上命段平仲韋貫之許孟容李絳等議減省冬十月己巳詔停河南陝府水陸轉運華潤州鎮海軍宣州采石軍越州義成軍洪州南昌軍福州靖海軍使額所收俸料委本道充百姓闕額兩稅吏部併省內外官計八百八員諸司流外一千七百六十九人諸州缺官職田祿米及見任官抽職田一分所在收貯以備水旱賑貸戊寅詔京兆府每年折配糶粟二十五萬石宜放於百姓有情愿折納者於時估外特加優饒今春歲

饑所貸義粟俟至豐熟送納其去年以前逋租並與放免冬十月癸巳吐突承璀受賄事覺出爲淮南監軍十二月壬申封十六宅諸王女爲縣主委宗正卿選門第人才配之己丑李絳入相閏月辛亥皇太子薨廢朝三日是歲天下大稔

七年春三月丙戌上御延英吉甫奏天下太平陛下宜爲樂絳謂漢文帝時賈誼喻云厝火積薪之下今法令所不能制者河南北五十餘州蕃戎徧處近接涇隴加之水旱時作倉廩空虛此正陛下宵衣旰食之時何得謂之太平遽爲樂哉上欣然曰卿言正合朕意退語左右吉甫專爲悅媚如絳真宰相也二人間之由是有隙上嘗語及貞元中政事不理吉甫對以德宗自矜聖智不任宰相所致上曰此事亦不可專咎德宗皆當時宰相懷祿偷安未有再三論奏者卿輩宜用爲戒吉甫每言人臣

不當強諫使君悅臣安不亦美乎絳復以爲人臣當犯顏苦口
指陳得失若陷君於惡豈得爲忠上以絳言爲是吉甫退至中
書長吁數聲臥不視事他日與于岫勸上峻刑上謂岫大是好
臣欲朕失人心耳語聞失色俛首竟日夏四月辛亥王播奏本
年賣鹽鐵除峽內井鹽外計收六百八十五萬九千二百貫有
御史自江南迺言水旱不至爲災上以問絳對曰臣得兩浙淮
南奏狀咸言歉甚且方隅授任皆可信重若此御史乃正當姦
佞之臣伏望明示姓名正以典刑上謝曰卿言是也向日不思
而問今知過矣命速蠲其租稅六月又與宰相論治道於延英
殿日盱暑甚汗透御服宰相求退上留之曰朕入禁中所與者
獨宮人宦官耳故樂與卿等共談爲理之要殊不知倦秋七月
乙亥立遂王宥爲皇太子改名恆八月戊戌田季安卒上欲控

制魏博用左龍武大將軍薛珪爲滑州刺史義成軍節度使冬
十月乙未魏博軍士奉兵馬使田典知軍州事遷季安子懷諫
於外殺蔣士則等十餘人甲辰賜典名弘正就命知節度事庚
戌更名皇子寬曰憚察曰悰寰曰忻察曰悟密曰恪十一月乙
丑命裴度宣慰魏博賜三軍錢給復百姓辛未東川觀察使潘
孟陽奏龍州武安縣佳禾生有麟采食羣鹿環遶光彩不可正
視畫圖來獻乙亥給事中李逢吉司勳員外郎李巨並充皇太
子諸王侍讀十二月己亥魏博奏管內州縣官員二百五十三
員請吏部銓注

八年春正月吉甫與絳數爭論政事上厭權德輿居中無所可
否罷之二月辛卯吉甫進所撰元和郡國并十道州縣圖及六
代略甲子于頔貶復名武元衡知政事辛未早上於禁中所禱

是夜湖雨丙子大風壞崇陵寢殿鷗尾折門戟夏四月丙戌以錢重貨輕出庫錢令常平收市布帛賜田弘正錢收市軍糧六月庚寅大雨毀屋飄瓦人多壓死所在川瀆暴漲行人不通上以爲陰盈之象命出宮人二百車任從所適秋七月吉甫奏三受降城爲河所毀請移於天德故城李絳諫止不聽八月庚寅詔甄獎故徐州刺史李洧等一十家子孫乙巳廢天武軍併入神策軍九月吐蕃併力於會州河上成烏蘭橋自是朔方禦寇不暇冬十月壬辰汴州劉弘以所撰聖朝萬歲樂譜共三百首來上壬辰振武奏廻紇千騎至鴨鵝泉十一月辛巳勅故張茂昭立功河朔舉族歸朝身沒之後家無餘財賜絹二千匹春秋二時支給壬午羣臣上表請立德妃郭氏爲皇后以歲時禁忌不許庚寅振武軍亂惡李進賢不恤士卒屠其家轉夏州張煦

以代率兵二千赴鎮許便宜擊斷是歲朋黨議起上問李絳答
言羣小欲害君子願陛下深察

九年春正月甲戌河東節度王鐔遣兵會張煦于善羊柵乙亥
煦入軍府誅亂首蘇國珍等二月丁丑貶李進賢通州刺史監
軍路朝寬配役定陵賜衆軍絹匹癸卯李絳罷名還吐突承璀
復以爲神策中尉三月丙辰雋州地震丁卯隕霜殺桑上御麟
德殿選大理裴榮棣男損杜佑孫棕尚主各賜緋夏四月庚寅
渾瑊配享德宗廟庭五月庚申復置宥州於涇原軍以備回鶻
撫党項乙丑旱開六場糴太倉粟以惠饑民免京畿夏稅并青
苗錢六月戊寅天德軍經略使周懷文卒廢朝一日經略使廢朝始此
壬寅張弘靖守刑部尚書同平章事閏八月辛酉以魏博歸順
復汝州以扞東都命烏仲翁兼刺史己巳加田弘正檢校右僕

射賞軍士錢九月乙丑吳少陽卒子元濟自總兵柄戊戌發兵
反焚劫舞陽等四縣冬十月甲子下制討之轉李光顏忠武軍
節度使嚴綬兼中光蔡等州招撫使內常侍崔潭峻爲監軍戊
辰以呂元膺爲東都留守十一月戊戌裴度爲御史中丞十二
月戊辰韋貫之同平章事

十年春正月乙酉加韓弘守司徒使居王錡檢校司空之上以
寵慰之丙申嚴綬帥師次蔡州界元濟縱兵侵掠及於東畿巳
亥詔削官爵二月甲辰賊襲官軍於磁丘綬退守唐州田弘正
子布韓弘子公武各率師隸李光顏辛亥以李絳爲潼關防禦
鎮遏等使柳公綽請率兵討賊許之在軍行號令嚴肅諸將咸
服三月乙酉遷韓泰等皆爲遠州刺史庚子光顏破賊於臨穎
夏四月甲辰又破賊於南頓辛亥盜焚河陰轉運院人情震駭

五月辛巳上以諸將久未有功命裴度兼刑部侍郎詣行營宣慰兼察用兵形勢使還奏諸將惟光顏功而知義必能立功知制誥韓愈上言淮西三小州破敵之餘其敗可立而待但未知陛下斷與不斷耳願悉罷諸道兵募士人以代之丙申光顏大破賊黨於洄曲殺數千人使來告捷京師相賀上乃賞度知人時同惡忠武元衡專任兵事王承宗上書詆訐上皆留中六月辛卯元衡入朝有賊自暗中刺之并刺裴度傷首而免京城大駭諸門悉加衛兵以金吾騎士導從宰相出入公卿持事柄者隨以兵仗上爲憤歎不食詔京城大索乙丑以裴度守刑部侍郎同平章事悉以用兵事委之秋七月甲戌詔絕王承宗朝貢奪所部博野樂壽謀於劉總安置駙馬王承系贊善王承廸司馬王承榮出所上表以示羣臣皆請問罪八月己亥朔日食丁

未嵩山僧圓淨陰托李師道謀反伏誅九月癸酉命韓弘充淮
西行營兵馬都統冬十月庚子析山南東爲兩道以戶部侍郎
李遜爲襄州刺史充襄復郢均房節度使辛丑刑部權德輿奏請行用新
爲唐州刺史充唐隨鄧節度使辛丑刑部權德輿奏請行用新
刪定勅格從之庚戌東都奏盜焚柏崖倉十一月壽州刺史李
文通敗淮西兵於固始壬申韓弘合光顏重胤敗賊於小汲水
拔其城乙亥罷嚴綬戊寅詔發振州兵二千會義武軍以討王
承宗十二月甲辰李愿擊敗李師道之衆斬首二千級逐北至
平陰而還壬子呂元膺奏盜焚獻陵寢宮請募三河子弟以衛
宮城庚申出宮人令有家者歸之

十一年春正月丁卯朔不受朝賀詔羣臣各議宥伐攻守之策
張弘靖以國力不支願併力淮西後征恆冀罷爲太原尹又罷

學士錢徽蕭俛戊寅劉總奏成德兵拔武強斬首千餘級癸未
詔削承宗官爵令王士則襲所封邑奉武俊祀益發河東河北
六道兵進討甲申盜斷建陵門戟四十七竿二月乙巳李逢吉
入相壬子出內庫絹四萬匹賞幽魏將士甲寅召李絳爲兵部
尚書乙卯郝士美奏破成德兵斬首千餘級己未劉總奏斬復
亦如之辛酉魏博軍拔固始城三月庚午皇太后崩發喪於西
宮兩儀殿勅諸司公事權取中書門下處分以裴度爲禮儀使
李逢吉山陵使甲戌見羣臣于紫宸門外廡下己卯霞寓奏敗
淮西兵於朗山焚其兩柵斬首千餘夏四月庚子光顏重胤又
捷於凌雲柵斬首三千級庚戌坐供軍有闕貶度支楊於陵郴
州刺史司農卿皇甫鎛始以聚斂得幸命兼御史中丞判度支
乙卯劉總奏深州功渾鎬奏九門功皆破成德兵五月丁卯宥

州軍亂逐刺史駱怡夏州節度田進討平之六月甲辰賊敗復
寓于鐵城退保新興柵人情悚駭上獨用裴度語以勝負兵家
常勢不可因一將失利便沮成計庚戌田弘正軍次於南宮辛
酉上大行太皇后諡秋七月丁丑貶霞寓歸州刺史以荆南節
度袁滋代之因歸罪饋餉不繼貶李遜恩王傳以河南尹鄭權
代之壬午宣武軍奏破賊於鄆城殺獲甚衆魏博又破成德兵
於南宮殺二千餘人八月壬寅韋貫之請罷兵與裴度爭論上
前罷爲吏部侍郎時諸鎮主約不一故多觀望獨昭義鄒士美
引兵壓河北境己未大破承宗之衆於柏鄉築三壘以環之甲
申祔葬豐陵九月丙子貶貫之湖南觀察使乙酉光顏奏拔凌
雲石越二柵丁亥李文通拔殷城六柵冬十月丙寅李師道聞
之而懼僞貢獻誠拜爲檢校司空十一月辛巳上怒諸將無功

命內常侍梁守謙監淮西行營出告身五百通及內庫緡錢金帛付之先加光顏左僕射重胤右僕射布御史中丞公武御史大夫皆檢校官示以無功必罰十二月壬寅程執恭敗成德兵於長河斬首千餘級渾鎬戰屢勝引全師距恆州三十里而營承宗懼潛兵焚掠鎬大敗奔還貶循州刺史丙午易州陳楚改定州刺史義武軍節度使丁未王涯入相甲寅除李愬以代袁滋己未邕管奏黃洞賊屠岩引是歲未央宮火京畿陳許并潤常湖循大水冬雷桃花

十二年春正月辛酉朔免朝賀癸未李愬至唐州存恤將士更示以弱淮西人輕愬名位非夙所畏不設備戊子豈出畢南長丈餘指西南近參箕三日而沒二月壬申李愬謀襲蔡州表請益兵詔以昭義河中鄜坊步騎二千給之時淮西倉廩空竭民

采菱芟野蔬而食多降官軍庚申勅於許汝行營側近置行縣以處之三月乙丑愬自唐州徙屯宜陽柵癸未吳秀琳以文城柵兵三千來降丁亥光顏破賊三萬於鄆城殺其卒什二三巳丑愬分遣十將攻諸柵其日董少玠下馬鞍山拔路口柵夏四月辛卯馬少良下螻呀山擒賊將柳子野媯雅田智榮又下冶壘城破西平丙申閻士榮下白狗汶港二柵丙午遊奕將王義破楚城庚戌改蔡州吳房縣爲遂平縣移置文城柵南新城內丁卯賊守將鄧懷金與縣令董昌齡以郟城降光顏引兵入據之元濟聞而大懼悉發親近及守城卒於洄曲以拒丙子始詔權罷河北行營專討淮蔡五月癸巳愬復敗賊於吳房獲其將李祐相與密謀襲蔡六月己未朔程昇督江淮財賦回得供軍錢百八十五萬緡以進令代王播爲鹽鐵轉運使壬戌元濟土

表請束身歸朝遣中使資詔許以不死乙酉京師大雨合元殿
一柱傾河南北水災邢洺尤甚秋七月募人入粟受官及減選
趙資庚戌上特選孔郊為嶺南節度使丙辰裴度請自往督戰
拜為持節蔡州諸軍行營宣慰處置使充彰義軍節度中光蔡
觀察等使崔羣代為中書侍郎同平章事馬總兼御史大夫充
宣慰副使韓愈兼御史中丞充行軍司馬員外郎司勳李正封
都官馮宿禮部李宗閔皆兼侍御史充判官書記以郾城為行
蔡州治所罷學士令狐楚為中書舍人恐其阻軍事也八月庚
申度發京師賜以通天犀帶勅神策軍三百衛從上御通化門
勞遣度望門再拜銜涕而辭甲申度至郾城奏罷監陣中使始
命詣將得專軍事戰輒有功九月戊子出內庫羅綺犀玉金帶
送度支估計供軍丁未李逢吉罷以李鄴為門下侍郎同平章

事甲寅愬攻吳房克其外城斬首千級餘衆退保子城李祐獻
變蔡之謀於愬愬遣書記鄭澥至郾城白度度以爲然冬十月
己卯大雪愬乘夜進兵破蔡城執元濟以獻淮西平辛巳度入
蔡州甲申捷聞詔委韓弘條疏立功將士軍人以下一切不問
百姓給復二年十一月丙戌朔上御興安門受俘獻元濟胡社
斬之次日論功加愬檢校左僕射弘兼侍中光顏重胤重檢校
司空公武檢校左散騎常侍布右金吾將軍祐神武將軍甲午
改郾城爲潁州析上蔡西平遂平三縣隸焉十二月壬戌賜度
爵上柱國晉國公復入知政事總檢校工部尚書蔡州刺史潁
頴陳許節度使愈刑部侍郎貶董重質春州司馬

十三年春正月乙酉朔御含元殿受朝賀大赦天下庚寅李師
道遣使奉表請納長子爲質并獻沂密海三州許之乙巳遣左

常侍李遜往彼宣慰二月乙亥御麟德殿宴羣臣大合樂自是上心寢侈命浚龍首池起承暉殿大興土木三月庚子李邺罷李夷簡遷門下侍郎同平章事辛亥王承宗上表待罪請以二子入侍仍獻德棣二州兼入管內租稅庚辰復承宗官爵程執恭改名權請入朝以華州刺史鄭權代之前滄州刺史李宗爽不受朝命烏重胤復往三軍懼遜宗爽奔京師明年被誅五月乙未李遜自鄆州還言師道反覆必須用兵轉李光顏於義成軍而以馬總代忠武軍謀討師道戊戌李惟簡卒李愬轉鳳翔尹孟簡代爲陳許潁蔡觀察等使六月癸丑朔日食丁丑移程權邠寧節度使秋七月癸未復轉李愬於武寧軍而以鄭餘慶鎮鳳翔乙酉詔削師道官爵令宣武魏博義成義寧橫海五鎮進兵宣歙觀察王遂爲供軍使內出綵絹十萬錢三十萬以給

之上方委裴度以兵事李夷簡等自謂不及求出鎮辛丑拜爲左僕射鎮揚州九月韓弘自將圍曹州時戶部侍郎皇甫鎛轉運使程異測知上意數進羨餘由是有寵甲辰並轉同平章事依前判使如故冬十月甲寅吐蕃寇宥州靈武軍破之於定遠城甲子平涼鎮退兵馬使郝玘奏收復原州破吐蕃二萬丙子轉李光顏忠武軍薛萃義成軍皆節度使十一月辛巳朔夏州靈武奏破吐蕃長樂州克其外城李道古窺上晚好神仙求以自媚乃因皇甫鎛薦山人柳泌於天台山合長生藥擢爲台州刺史功德使又奏鳳翔法門寺塔有佛指骨相傳三十年一開則歲豐人和來歲應開請迎之十二月庚戌朔上遣中使率僧衆以往戊寅上以芻蕘漸起心惡之語宰相曰人臣事君但力行善事自致公望何乃好樹芻蕘裴度辨別等類極口言之

上以其言大抵相類其中甚遠故莫能辨乙卯晦李愬與平盧兵十一戰皆捷進攻金鄉復克之

十四年春正月庚辰朔不受朝賀辛巳韓弘拔考城丁亥迎佛骨至京師留禁中三日歷送諸寺王公士庶奔走捨施如恐不及韓愈上疏極論貶爲潮州刺史壬辰李愬奏拔魚臺丙申弘正奏破東阿丙午又破陽穀二月己酉朔李聽襲海州克東海朐山懷仁等縣李愬又敗之於沂州師道聞官軍侵逼遣都知兵馬使劉悟將兵萬餘以拒發民治城塹修守備役及婦人民益懼且怨悟務爲寬惠使人人自便師道欲殺之夜半潛入鄆州宣言奉帖追還斧牙城門而入索師道并二子皆斬之送其首弘正營撫定州民斬同謀二十餘家壬戌露布以聞淄青平甲子上御宣正殿受賀己巳御興安門受俘庚午賞功封悟彭

城郡王食邑三千戶加弘正檢校司徒同平章事三月丁酉宴

羣臣於麟德殿自廣德以來垂六十年河北三十餘州自除官

吏不供貢賦至是盡遵約束上命戶部侍郎楊於陵分其地爲

三道轉馬總鄆州刺史領鄆濮曹等州薛萃青州刺史領淄青

齊登萊等州皆爲觀察使王遂沂州刺史沂海兗密等州都團

練使烏重胤奏今之藩鎮所以能拒朝命由諸州縣各置鎮

將領事收刺史縣令之權自作威福向使刺史各得行其所職

雖有奸雄豈能獨反臣所領德棣景三州已先舉牒各還刺史

職事應在州兵並令刺史統領朝議從之夏四月丙寅詔諸道

節度副觀察等使所統支郡兵馬並令刺史領之

其後河北諸鎮惟橫

海最爲順命由重辛未鉅陰擗裴度罷爲太原尹秋七月戊寅

亂處置得其宜也

韓弘入朝獻助平淄青銀絹馬匹緡錢糧斛并金銀器玩上待

之甚厚辛巳上受冊寶號曰元和聖文武法天應道皇帝大
救天下時諸道各獻錢爲賀賊平又賀及助軍賞等錢左右中
尉亦爭獻納丁酉鑄引令狐楚守中書侍郎同平章事癸卯沂
州軍亂以王遂苛虐殺之命棣州刺史曹華代任誅亂首王弁
八月己酉弘堅辭戎鎮命守司徒兼中書令以張弘靖代鎮宣
武上下安之己未田弘正來朝上待之尤厚癸亥開宴麟德殿
判官及將校三百人賜物有差九月戊寅三上表乞留闕庭不
許仍遣赴鎮弘正恐物故後魏人猶襲故事乃令弟及子姪皆
仕于朝上擢居顯列時人榮之冬十月壬戌安南賊帥楊清殺
都護李象古并家屬部曲千餘人朝命唐州刺史杜仲武領任
敬揚清爲瓊州刺史吐蕃寇鹽州党項發兵助之靈武將史敬
奉深入殺敵大勝而還賞實封五千戶自十一月以來上服柳

泌金丹漸加煩躁起居舍人裴潯切諫上怒貶爲江陵令皇甫
縛潛崔羣上尊號不加孝德二字又扇惑邊軍給賜不時怨怒
流言上以爲然十二月乙卯罷羣爲潭州刺史人皆切齒於縛
十五年春正月甲戌朔上不豫罷元會吐突承璀謀立澄王暉
爲皇太子上不許丙申劉悟來朝對於麟德殿帝因服藥多暴
怒左右宦官往往獲罪有至死者庚子夕帝暴崩於大明宮之
中和殿年四十三皆言內官陳弘志弑逆其黨諱之不敢討賊
給云藥發外人莫能明中尉梁守謙與諸宦官馬進淵劉承偕
韋元素王守澄等共立太子殺承璀及澄王賜左右神策并威
遠左右金吾各軍士緡錢多寡有差辛丑宣遺詔壬寅移仗西
內諡曰聖神章武孝皇帝廟號憲宗

冊曰章武勵精果斷剛明收功相道僭亂削平大慈旣鋤

強悍攸戢綱紀再張雲開見日侈心一萌蠹腐交攻求延
反蹙大命以傾千古一時遺恨莫窮

弘簡錄卷之八

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之十二

穆宗皇帝諱恆憲宗第三子母貴妃郭氏以貞元十一年七月生於大明宮之別殿初名宥封建安郡王進封遂王領彰義節度大使冊爲皇太子改今諱憲宗崩後七日丙午卽皇帝位於太極殿東序時未聽政卽名翰林學士段文昌杜元穎沈傳師李肇侍讀薛放丁公著侍禁中參預機密並賜金紫丁未貶皇甫鉉崖州司戶戊申見宰相於紫宸門令狐楚薦中丞蕭俛與文昌並爲中書侍郎同平章事上欲誅俛俛及宦官救免壬子杖殺柳泌及僧大通自餘方士皆流嶺南貶李道古循州司馬

癸丑上欲用放公著爲相固辭拜放工部侍郎公著給事中
辰朝羣臣於宣政殿是夜地震庚午尊郭氏爲皇太后朔朔
帝性侈所以奉養者尤爲華靡贈后父駿太傅母齊國大長公
主拜兄釗刑部銓工部皆尚書二月丁丑大赦天下宣制甫畢
陳俳優百戲於丹鳳門內縱觀之丁亥幸左神策軍觀角觝雜
戲癸巳廢邕管經略使命容管陽旻兼領之三月壬子召侍講
學士韋處厚路隨講毛詩關雎尚書洪範等篇賜緋魚袋辛酉
柳公權入爲右拾遺翰林侍書學士上見其書跡愛之問曰卿
書何能如是之善對曰用筆在心心正則筆正上知其筆諫默
然改容夏四月監察御史楊虞卿疏請延對羣臣周徧顧問惠
以辭色使人進忠衡山人趙知微疏諫遊獵上不能用亦不加
罪五月丁酉上憲宗諡癸卯宰相以國用不足應天下兩稅鹽

茶酒雜課及戶部闕官除陌等錢每貫量抽五十文付度支收
管待國用稍充卽依舊制庚申葬景陵六月辛未朔上以昇儲
日崔羣嘗羽翼之名爲吏部侍郎丁丑安南將士開城復納桂
仲武遂執楊濟析之收復安南仍用仲武爲都護己卯令狐楚
尅山陵工徒價錢充羨餘以獻罷爲宣州刺史壬辰詔停抽貫
錢出內庫錢三十七萬五千貫付度支給川癸巳皇太后移居
興慶宮上與六宮侍從宴于南內大合樂回幸右軍頒賜中尉
等有差自是左右軍三日一幸及御宸暉九仙等門觀角觝雜
戲秋七月乙巳上誕辰迎皇太后就帝宮上壽百寮命婦並於
光順門參賀永爲定式己酉賜鄆曹濮節度號天平軍自五月
不雨壬子始雨甲寅御新建永安殿觀百戲乙卯幸安國寺觀
孟蘭盆壬戌縱吐蕃使者於安國慈恩千福開業章敬等寺遊

觀丙寅新作寶慶殿成與中宮貴王妃嬪宴以落之八月辛未
楊於陵總百寮議取兩稅權酒鹽利等悉任土所產物充稅並
不徵見錢從之乙亥賜教坊錢壬辰幸魚藻池發神策兵三千
開浚戊戌中丞崔植守中書侍郎同平章事九月辛丑大合樂
於魚藻宮觀競渡又欲於重陽日宴羣臣拾遺李珣等上疏以
甫過公除諫止不聽己酉大雨雪損田稻戊午加裴度司空李
光顏李愬入朝並同平章事辛丑賜宴麟德殿頒賜優厚丙寅
量移韓愈湖與袁州轉崔羣武寧軍節度使丙寅轉孔戣吏部
侍郎時容桂二管川兵彫敝惟殘所部晏然冬十月庚午朔閣
婆國遣使朝貢王承宗卒弟承元表請命帥遣起居舍人柏耆
宣慰之壬午羣臣入閣諫議大夫鄭覃崔郾等奏今敵寇壓境
陛下晨夕與倡優狎暱忽有急奏不知乘輿所在加以賜與無

節百姓無措上以闕中久無論事者甚訝之問宰相此輩何人
對曰諫官上乃使人慰勞之謝曰當依卿言宰相皆賀實不能
用壬午党項以夏州田縉侵尅引吐蕃寇涇州命中尉梁守謙
將神策軍四千赴援未至退去乙酉轉田弘正成德軍王承元
義成軍李愬魏博劉悟昭義田布河陽三城皆節度使時郝玘
李光顏奮力以拒吐蕃朝廷賞神策軍反厚衆皆不服光顏陳
大義論衆方止丙戌罷神策行營丁亥吐蕃復寇西川侵雅州
東川王涯獻策欲厚賂北蕃俾入西蕃據其地得人多少賞之
十一月癸卯遣鄭覃詣鎮州賜將士錢一百萬緡并監視承宗
葬事封其祖母李氏晉國太夫人乙卯上幸郭鏐城南莊戊午
又將幸華清官宰相率兩省及諸司詣延英門三表切諫不聽
諫官伏門下至暮乃退次日上由複道出幸從以左右中尉諸

王駙馬千餘人至晚還宮癸亥朝議以涇原行營兵馬使郝玘
奮勇深入悉失勇將移之內地以爲慶州刺史十二月己巳朔
吐蕃又寇鹽州圍烏白池南詔請入討之壬午上幸右軍擊鞠
遂敗於城西癸未容管奏破蠻賊黃少卿衆萬餘拔營柵三十
六是歲戶部奏天下戶總三百三十七萬五千四百口總一千
五百七十六萬元不進戶軍州不在此內

長慶元年春正月己亥朔朝獻太清宮太廟辛丑南郊大赦改
元朝太后於興慶宮戊午夜幸出于翼丁卯出辰近太微西垣
二月丙子上於麟德殿觀雜伎樂歡甚顧謂丁公著曰比聞時
和民安外間公卿士庶時爲歡宴甚慰朕心對曰自天寶後風
俗奢靡公卿大夫競爲沉湎以致百職皆廢陛下宜頒訓令禁
其過差則天下幸甚三月癸卯幽州劉總請辭位帝以總爲
僧分割所

管郡縣爲三道支三軍賞設錢一百萬貫命給事中韋弘慶往
宣慰左拾遺狄兼謨副之朝議張弘靖爲幽州長史盧龍軍節
度使砥分瀛莫等州以盧士攻爲都團練觀察使壬申杜元穎
爲戶部侍郎同平章事辛卯舉食節宴羣臣於麟德殿三月丁
未宗正寺奏今歲勅放宗子三百人數少不霑恩澤乞降特恩
更放二百人出身從之戊午封皇弟憬鄜王悅瓊王恂河王懌
婺王愔茂王怡光王協淄王憺衛王忱澶王皇子湛景王涵江
王渙漳王溶安王灑潁王珣四月德裕宗閔黨禍起貶黜鄭朗
等十人甲午弘靖入幽州宰臣朝賀遣告陵廟給復其民五月
辛亥宮中造百尺樓壬子鹽鐵使王播奏增榷茶稅李珣等論
其不可不報癸亥皇妹太和公主出降迺絃六月辛未吐蕃犯
青塞堡甲申賜中丞牛僧孺金紫秋七月壬子上受冊號曰文

武孝德皇帝大赦天下甲寅幽州軍亂囚張弘靖害判官韋雍
張宗元崔仲卿鄭瑱立朱泚子克融爲留後由是作亂復失河
北迄于唐亡八月己巳鎮州亦殺田弘正推衙將王庭湊爲留
後詔公卿大臣各議討伐之謀惟左金吾將軍楊元卿先言易
置幽鎮帥臣非便受賞癸酉廷湊遣盜殺冀州刺史王進峩據
其城乙亥起復田布爲魏博節度使令出兵赴貝州行營辛巳
莫州將張良佐潛引幽兵逐刺史吳暉瀛州又執盧士玫送於
幽州己丑命裴度充幽鎮兩道四面行營招討安撫使左領軍
衛大將軍杜叔良充深冀諸道行營節度使而辭言賊旦夕必
破上喜癸巳鎮兵圍深州命內侍段文政監領鄭滑河東陳許
三道兵救之九月乙巳相州兵亂殺刺史邢楚王子幽兵掠易
州并涑水遂城滿城諸縣冬十月丙寅王播加中書侍郎同平

章事戊辰加深州團練牛元翼鎮州大都督府長史充鎮冀深
趙等州節度使乙亥裴度自將兵出承天軍故關戊寅幽兵寇
蔚州鎮兵寇貝州己卯易州刺史柳公濟滄州節度烏重胤各
破之於白石嶺并饒陽壬午裴度奏元稹與知樞密魏弘簡交
通亂政奏盡軍事多爲阻撓癸未罷稹工部侍郎弘簡弓箭庫
使時上急於誅賊重胤奏賊勢未可猝平宜用兵稍緩上怒轉
叔良滄州徙重胤山南西道戊子田布率全師三萬進討鎮州
屯於南宮拔其二柵辛卯劉悟將貽義兵次于臨城十一月甲
午朔裴度被賊於會星鎮又入元氏焚壁二十二上聞沂州刺
史王智興有勇略以爲武寧軍節度副使遣率師赴行營戊午
上御宣政殿試制科舉人辛酉淄青牙將馬延蓋謀逆節度使
薛萃覺其謀而誅之十二月庚午鎮人敗杜叔良於博野陷七

子衆僅以身免貶爲歸州刺史以李光顏代之辛巳赴鎮勅神策副使楊承和爲都監時府藏空竭勢不能支仍割諸道錢每貫二百文并出內庫錢五萬貫以助軍執政議鎮州殺弘正幽州尚全弘靖罪有輕重請赦克融專討延湊上從之乙酉投克融幽州節度使戊子陳楚破莫州清源等三柵斬獲千餘

二年春正月癸巳朔罷元會丁酉克融復陷滄州弓高縣還攻下博兼邀餉車六百乘而去庚子魏博兵潰先鋒兵馬使史憲誠納之朝命以爲魏博節度使憲誠遂與幽州連結庚戌賜德州刺史王日簡姓名李全略以領滄州橫海軍甲寅復以弓高縣爲景州庚子王延湊圍牛元翼於深州官軍三萬救之乏糧不能進助以內庫物八萬二月甲子深州圍益急朝廷不得已併雪廷湊授鎮州長史成德軍節度使三軍將士待之如初仍

令兵部侍郎韓愈往彼宣慰克融旣得旌節乃出弘靖士致授
弘靖撫州刺史辛巳崔植罷以元稹同平章事與裴度宿怨欲
奪其兵柄勸上罷兵壬午罷度守司徒充東都留守而以李聽
代領河東癸未轉李光顏橫海軍恐饋運難通命割滄景二州
隸之以李全略領德棣二州軍士不歡大呼西走光顏不能制
上表固辭還鎮許之乃復合滄景德棣爲一授全略節度使三
月壬辰詔神策六軍使及南衙常參武官各具歷任功績送中
書量加獎擢其諸道大將之次及有功者悉奏與官於是商賈
胥吏爭賂藩鎮牒補列將升于朝籍戊申諫官爭言時未偃兵
不宜置度散地復命入朝對於麟德殿自陳用兵無功嗚咽流
涕上改容勞之壬子改鎮淮南癸丑智興逐其帥崔羣自專軍
務朝廷以新罷兵卽授武寧軍節度使丙辰度受司徒冊訖謁

太廟赴尚書省宰臣百寮皆送戊午復名入中書知政事夏四月辛酉朔日食甲戌以傅良弼李寰爲神策都知兵馬使癸未韋處厚路隨進所撰六經法言二十卷賜金紫丁亥夜東北有流星光彩燭地殷殷有聲出天市垣至郎位滅五月戊午隴山獻異獸如猴尾長色青赤而鷲見蕃人則躍而食之遇漢人則否六月甲子度與積皆罷復相李逢吉知政事丁卯党項寇渭北掠官馬吐蕃寇鹽州戊子復置邕管經略使以安南副使崔結爲之秋七月戊戌汴州牙將李臣則等作亂逐節度使李愿立都押衙李芥爲留後丙午貶愿隨州刺史以鄭滑韓充領鎮宣武徵芥爲右金吾衛將軍不奉詔癸丑譏討李芥命李光顏將兵二萬五千屯于尉氏兗海曹華聞亂不俟詔卽發兵赴之芥遣兵三千攻宋州與高承簡逆擊破之丁巳光顏敗宣武兵

斬獲二千餘人八月甲子充入汴境軍于千塔智典與承簡共
破宣武兵斬首千餘衆遁去壬申充又敗之于郭橋進軍葛勝
丙子汴州監軍姚文壽與兵馬使李質同謀斬弁及其黨薛志
忠秦隣等丁丑充入汴州送弁妻男赴京斬首沒入命光顏兼
侍中轉曹華義成軍承簡究海沂密皆節度使李質石金吾衛
將軍穎楛鄭滑觀察使九月戊子朔浙西大將王國清謀叛觀
察使竇易直討平之誅同惡三百餘人進易直吏部侍郎李德
裕代爲浙西觀察使丙申李全略殺德州刺史王稷屠其家以
軍亂聞丁亥朱耶執宜來朝賜以官誥錦綵銀器冬十月戊辰
烏重胤來朝移授天平軍己卯上由複道幸咸陽止於善因佛
寺大施錢絹閏月己亥始修憲宗實錄甲寅旱詔委淮南兩浙
宣歙江西福建等道觀察使各取常平義倉減價出糶以惠貧

民十一月庚子上從皇太后幸華清宮命景王率禁軍五百以從又幸石甕寺數日方還癸酉獵于驪山卽日馳還庚辰帝與內官擊鞠罷升殿足病不能履地風眩就牀十二月庚寅宰臣率百寮至延英門乞入見不報裴度等三疏請立皇太子辛卯上於紫宸殿御大繩牀見百官逢吉奏景王成長宜立度又極言癸巳詔從之己未疾寢瘳勅在京諸司疏放繫囚兩軍容公主戚屬皆于佛寺飯僧丙午上御宣政殿冊皇太子大赦丁未日官改撰新曆賜名曰宣明始行用之

三年春正月丁巳朔不受朝賀知樞密王守澄乘上疾專制國事勢傾中外嗣郢王佑坐妄傳禁中語安置崖州二月諫議大夫殷侑請置三傳三史科貢舉取士侍郎王起奏試貢舉人申送中書覆訖放榜從之三月壬戌以戶部侍郎牛僧孺同平章

事李德裕怨逢吉排已而薦僧孺結黨益深工部尚書鄭權歸
結守澄門客鄭注以求節鎮夏四月己酉遂得嶺南節度使建
官車馬盈於注門六月監修國史杜元穎奏史官沈傳師除鎮
湖南將所分隨任修撰從之秋七月嶺南黃洞蠻寇邕州破左
江鎮及欽州千金鎮刺史楊興奔石南若八月癸巳破之邕管
丙申上由複道幸興慶宮至通化門賜持孟僧絹囚幸五坊賜
從官金銀綵癸卯罷裴度鎮山南西道逢吉惡之不兼平章事
九月南詔王丘佺進金碧丈絲十有六品十月乙丑成都尹杜
元穎赴鎮上御安福門餞送因賜皇城留守及金吾衛卒等帛
自後賞賜益濫十一月觀作毗沙門神賜絹五百匹

四年春正月辛亥朔御殿受朝如常儀有處士張臯以上卮金
石藥恐蹈覆轍上疏切諫令名之不獲庚午帝疾復作辛未大

漸詔皇太子監國宦官援故事請郭太后臨朝稱制不許壬申崩於寢殿年三十遺詔皇太子卽位李逢吉攝冢宰癸酉遷柩發喪羣臣上諡曰睿聖文惠孝皇帝廟號穆宗

冊曰亡唐之禍厥基河北忠謀淪喪逆亂翻覆彼昏不知其何能淑

天王 唐一之十三

敬宗皇帝諱湛穆宗長子母妃王氏以元和四年六月七日生於東內之別殿初封景王正位東宮帝崩後五日丙子卽位于太極殿東序時年十六宰臣建議請量國力頒賞神策諸軍人絹十匹錢十千畿內諸軍半之餘又半之時雖減於先朝仍於物議多以爲是於內庫出綾緞二百萬段付度支充邊軍春衣羣臣五上章請聽政二月辛巳朔上綾殿見於紫宸門外壬午渤海送入備宿衛

大聰等五十人癸未李逢吉誣李紳不利於上貶爲端州司
馬上自閱禁中文書得紳與杜元穎請上爲太子疏譖言方止
己亥冊皇太后郭氏爲太皇太后乙巳尊母王氏爲皇太后庚
子元穎進罽毳大毳衣五百事辛丑始御紫宸殿受朝旣退幸
飛龍院厚賜內官丁未御中和殿擊毳毼賜教坊樂官綾絹三千
五百匹自此濫賞不絕戊申擊毳於飛龍院己酉大合樂於中
和殿極歡而罷賜與無算三月壬子大赦常貢外不得進獻甲
寅對宰臣於延英殿上因三奏湊害故節度牛元翼家惜其冤
橫因歎宰執非才縱姦臣跋扈學士韋處厚奏曰理亂之本非
有他術順人則理遠人則亂陛下當食歎息尚不如名裴度用
之戊辰羣臣入閣上日高未御諫議大夫李渤出閣待罪久始
御坐班退左拾遺劉栖楚極諫以頭叩龍墀血流被面上爲動

容是日編昨徐忠信闖入浴室門決杖流天德軍庚午賜內教坊錢萬緡以備遊幸甲戌夏州李祐奏築烏延宥州臨塞陰河陶子等五城于塞外以備蕃寇又於蘆子關北木瓜嶺築壘以扼党項夏四月甲寅王播罷以王涯代領鹽鐵轉運等使請改東都江陵監大轉運留後並爲知院官丙申上在清思殿擊毬有卜者蘇玄明誘染工張韶等作亂入右銀臺九仙等門揮兵大呼上聞變急幸右神策軍賊遂登清思殿御榻而食大將軍康藝全與兵馬使尚國忠率兵討平之丁酉還官羣臣稱慶李渤諫上輕率致盜言甚激切己亥杖諸監門宦者不改任辛丑流染坊使田晟段政直於天德軍壬寅賞立功將士拜藝全鄜坊節度使馬存亮求出外以監淮南軍雪吐突承璀罪令改葬五月乙卯吏部侍郎李程戶部侍郎竇易直並守本官同平章

事程請加禮裴度又以上好治宮室欲營別殿請以木石回奉
山陵從之上亦見度奏狀無平章事以問韋處厚丙申加度同
平章事李光顏守司徒秋七月甲戌御史溫造於閤內彈劾李
祐違詔進馬祐趨出待罪詔宥之丙子李德裕奏令造脂盃鞋
其計用金銀乞會官商議八月丁酉夜妖賊馬文忠與品官季
文德等一千四百人將圖不軌詔皆處死己丑錄忠臣李愷孫
宏河南兵曹叅軍蔣清孫鄴爲伊陽令壬辰江王府長史段釗
上言本朝祖墓在龍州近郭有牛心山其中掘斷處宜須修築
從之丁未波斯大商李蘇沙進沉香亭子材拾遺李漢諫云此
何異瑤臺瓊室上怒優容之乙卯罷理匭使戊午李德裕奏浙
西織造可幅盤條撩綾一千匹乞令罷之己巳浙西淮南各進
宜索銀粧奩三具冬十月戊戌上遊宴無度韋處厚極諫上威

其言賜以綵段銀器辛丑吐蕃貢犛牛及銀鑄犀牛羊鹿各一併求五臺山圖十一月戊申安南都護李元素奏黃家賊與環王國合勢陷陸州殺刺史葛維十二月癸未廻紇奚契丹各遣使朝貢乙未諫議大夫獨孤朗等伏閣論王播厚賂貨要復領諸道鹽鐵轉運事出中旨李德裕又論王智典進制請置僧尼戒壇爲上祈福皆不報是歲關內關東陳許蔡鄆曹濮婺睦大水出太倉粟及折百官俸以惠貧民

寶曆元年春正月辛亥南郊大赦改元時帝荒淫嬖倖用事宦官橫暴殿鄆縣令崔發繫之臺中諫官李渤張仲方言之不聽宰相逢吉曲救乃免牛僧孺畏罪不敢言累表求出乙卯升岳鄂爲武昌軍以爲節度使壬申李德裕獻丹扈箴六首上深嘉之辛卯李翱面數宰相過失出爲廬州刺史三月壬子宴羣臣

於三殿戊辰夜有流星長三尺出紫微入濁滅辛未上御宣政
殿試制舉人以中書舍人鄭涵吏兵二部郎中崔瑄李虞仲同
考後數日上語宰相所取韋端符楊魯士皆涉物議請問罪名
不報乃外補端符白水尉魯士城固尉夏四月甲戌朔始宣授
劉栖楚爲刑部侍郎癸巳羣臣上徽號曰文武大聖廣孝皇帝
赦天下進封李逢吉鄭國公移李紳江州長史乙亥御史蕭徹
彈京兆尹崔元略違詔徵畿內所放錢削其所兼御史大夫因
以父事中官崔潭峻復遷戶部侍郎五月庚戌幸魚藻宮觀競
渡詔王播造競渡船二十艘計功當轉運半年之費諫官張仲
方切諫乃減其半六月丙戌賜諸司白身馮志謀等並衣綠秋
七月甲辰王播復日進羨餘物議以誅求嚴急正入不充多非
毀之乙丑侍講學士崔郾高重進纂要十卷賜錦綵閏七月拾

遺李漢衍元褒薛廷老於閣內論奏除授進擬不山中嘗悉內
中宣出伏請詳察上然而不改八月戊午遣中使往湖南江南
天台山等處訪求異人冀獲靈藥以興唐觀道士劉從政爲光
祿少卿賜號昇玄先生十二月癸未上欲幸驪山溫湯拾遺張
權輿叩頭諫歷舉周幽王秦始皇本朝玄宗爲鑒戒上口若此
之凶我當一往以試彼言庚寅駕幸溫湯卽日還宮謂左右曰
彼叩頭者之言安足信哉丙申封皇子普爲晉王領昭義副大
使是歲兩京河西大稔淮南浙西宣襄鄂潭湖南等州旱傷稼
二年春正月上性好土木自冬至至此興作相繼辛未怒殿中侍
御史王源植與教坊樂伎喧競貶爲昭州司馬甲戌發諸軍及
丁夫二萬入內穿池修殿壬辰裴度自興元入朝復知政事二
月丁巳寒食宴羣臣庚申方止三月戊辰朔興唐觀道士孫準

翰林待詔辛未江西殷侑違制請於洪州寶歷寺置僧尼戒壇
罰俸一季甲戌上巳賜宰臣百寮宴于曲江亭戊寅幸魚藻宮
癸未崔植奏停廣湖封雷潘辨等七州戊寅丙戌昆明焚遣使
朝貢丁亥冊晉王普母才人郭氏爲貴妃夏四月丙午王延湊
請於本道立聖德碑命內出文賜之庚戌併河州并漢陽汝川
兩縣咸隸鄂州五月戊辰朔上御宣和殿召內人親屬一千二
百人並於教坊賜食各頒錦綵辛未祕書省著作郎韋公肅注
太宗所撰帝範十三篇以進特賜錦綵戊寅浙西送絕粒女
士施子徵庚辰中使自新羅取鷹鷓回是日幽州軍亂殺朱克
融及男延齡立仲子延嗣爲留後辛巳內苑掘地獲白玉牀一
張長六尺癸未山人杜景先進狀自稱有道術令中使押往浚
南江湖嶺南諸州求訪異人甲午賜劉從政修院錢二萬貳六

月丁巳減放苑內役夫庚申鄆州進驢打毬人石定寬等四人
辛酉幸凝碧池癸亥旱慮囚以延康坊官宅爲諸王府司局甲
子上御三殿觀兩軍教坊內園分朋驢鞠角觥至乙夜方罷有
碎首折臂者秋七月乙亥令內園名募河中力士八人來進已
卯幸興福寺觀沙門文淑俗講壬辰宣索左藏見在銀二萬兩
金七千兩悉貯內庫以便賜與八月丙申朔以裴度判度支上
信道士趙歸真神仙之說及僧惟真齊賢正簡禱祠之言皆預
供奉出入宮禁潤州人周息元乘間自稱壽數百歲遣中使迎
入內間以道術言識張果葉靜能李德裕言其誕妄不聽九月
丁丑朔大合樂於宣和殿陳百戲四日方已戊寅幽州兵馬使
李戴義復殺朱延嗣軍中推爲留後冬十一月甲子朔趙歸真
充兩階道門都教授博士上好深夜自捕狐狸中官許遂振李

少端魚志弘以侍從不及俱削職復杖宣徽使閻弘約馬使劉
弘逸中官李奉義王惟直成守貞分配諸陵十一月八日上夜
獵還宮與中官劉克明田務成許文端打毬軍將蘇佐明王加
憲石定寬等二十八人飲酒酬上入室更衣殿上燭忽滅克明
等同謀弑帝崩于室內時年十八諡曰睿武昭愍孝皇帝廟號
敬宗

冊曰寶曆不君國統幾絕天未降喪一本三葉文武疊興
九有有截

天王 唐一之十四

文宗皇帝諱昂穆宗第二子母真獻蕭皇后以元和四年十月
十日生賜名涵初封江王爲人恭儉儒雅出於自然在藩邸喜
讀貞觀政要孜孜治道有意願效太宗敬宗已遇弑蘇佐明等

矯稱遺旨命學士路隨草制立絳王悟權勾當軍國事次日宣制絳王見宰相百官於紫宸門外廡樞密使王守澄中尉魏從簡梁守謙以克明等欲奪諸內侍權乃率禁軍討賊併害絳王迎帝于江邸癸卯以裴度攝冢宰百官謁見於閣內下教處分軍國事甲辰見諸軍使於少陽院配流僧惟真三人道士趙歸真紀處玄楊沖虛術人李元戢王信等並於嶺南擊毬軍將于登等六人令本軍處置宰臣百寮以太皇太后令三上表勸進乙巳卽位於宣政殿更令諱丙午赴西宮成服丁未請聽政表三上許之戊寅尊祖母郭太后仍太皇太后母爲皇太后嫂郭后爲寶曆太后時三宮並峙上性孝謹事之如一每得珍異先薦郊廟次奉三宮然後進御內園進櫻桃啓云別賜三宮御筆改賜爲奉庚戌以韋處厚爲中書侍郎同平章事詔令儀法內

外處置皆出其手無不叶宜路隨宋申錫充書詔學士丁巳廢朝三日爲絳王舉哀上深知兩朝積弊下詔悉出宸斷放內廷宮人無職掌者任從所適長春宮斛斗諸物依前戶部收管鄂縣漢陂鳳翔府洛谷地還該府縣御馬坊毬場却還龍武軍教坊樂官翰林待詔伎術官并總監諸色職掌冗員並停廢勅牒放歸度支先供教坊衣糧及諸司新加卽與停給解放尚方鷹鷄供應小兒及纂組雕鏤不在常貢內者並準貞元舊額爲定年支供應一物以上不許擅入先造牀榻用金篋瑟瑟寶鈿一併停造自今應行從處不得張陳花燭結綵華飾諸道所進音樂女人各賜束帛放還城外墳墓先有開廡以備行幸處曉示百姓任其修塞除大逆蘇佐明并妖妄僧道外其情非姦惡跡涉誣誤者一切不問中外見者以承父兄奢弊之餘聞寺撓權

之際而能以治易亂化危爲安士民相慶共喜理道之復興矣
太和元年春正月故事隻日視事帝欲與宰輔每日相見乃命
輟朝放朝俱用雙日丙申復置兩輔六雄十望十繁三十四州
別駕其諸色在京及內外諸軍使等職事並不在挾名限乙巳
大赦改元甲寅勅諸道節度觀察使凡去任具交割狀限新使
到任一月分析聞奏以憑殿最三月壬戌朔右軍中尉梁守謙
致仕以王守澄代之李同捷遣弟同志同異并掌書記崔從長
奉表入見請遵朝旨夏四月甲午鳳翔築臨沂城壬寅毀昇陽
殿東放鴨亭戊申毀望仙門側看樓己未王沛卒宰相始擬太
僕卿高瑀代爲忠武軍節度使自大曆以來除授皆禁軍大將
資高者多稱貸富室以賂中尉然後得之未嘗由執政自是債
帥始革己巳貶李逢吉黨山南副使李續行軍司馬張又新治

與汀州刺史上虛懷聽納宰相每御延英入對幸漏下十一刻
然不能堅決議事已定尋復中變章處厚極論之因請避位五
月戊辰下詔慰勞君臣之間義深同體理在坦懷朕方推衷大
信置人心腹况吾台宰又何間焉自今已後無得輒求遜避丙
子徙李同捷兗州移烏重胤橫海軍就加史憲誠同平章事李
載義康志睦王延濬皆檢校官甲申王播來朝力闢大用獻銀
器綾絹六月癸巳命爲左僕射同平章事癸卯詔元和長慶中
所下制勅皆因用兵權以濟事難以通行令尚書省叅詳剛定
送中書門下議定聞奏甲寅旱秋七月癸酉葬莊陵同捷不受
詔謀結幽鎮以叛王智興請全軍討之拜爲平章事滄州行營
招撫使八月庚子詔削同捷官爵復任張茂宗於兗海命重胤
志睦憲誠載義李聽張璠各帥本軍致討同捷遣子弟賂諸鎮

珍玩女妓載義執之以獻憲誠全略先與婚姻密輸糧助懼法不復敢通多十一月丙申烏重胤卒從王智興請以李寰代之二年春正月上勤於政理凡選內外羣官宰相進名必面試其行能然後補除二月李絳進刪定則天太后兆人本業三卷勅令所在州縣寫本散配鄉村三月辛巳御宣政殿親試制策舉人劉蕢對策極言宦官之禍考官馮宿賈餗龐嚴懼黜之物論黨然稱屈同年李邵等奏請回所受官投蕢以旌其直不報

議者謂帝他日移所以任請注者以任蕢庶幾可以有濟也

閏月史憲誠遣其子唐將兵趣

德州帝性恭儉惡侈靡五月庚子勅諸道應進奉內庫四節及降誕金花銀器纂組文纈雜物並折充錠銀及綾絹其中有賜與所須待五年後續有進止常自撰集尚書中君臣事迹命畫工圖於太液亭朝夕觀覽焉王延湊爲同捷求節鉞不許助爲

叛逆出兵境上以撓魏師又遣使厚賂沙陀欲與連兵朱耶執
宜拒不受秋七月甲辰議討王延湊命隣道各嚴備禦昭義劉
從諫表請出兵是夜彗西出攝提南長二尺八月己卯從諫與
延湊戰于臨城敗之九月丁亥智興奏拔棣州庚寅李寰自晉
州赴鎮不戢士卒所過殘暴坐索供饋改爲夏州節度使傅良
弼代任橫海軍甲午詔削延湊官爵促諸軍四面進討庚戌安
南軍亂逐都護韓約冬十月戊寅史憲誠敗同捷兵拔平原壬
午李載義又敗之于長蘆十一月癸未朔柳公濟攻拔堅固寨
破其兵於寨東甲辰禁中昭德寺火十二月丁巳王智興奏兵
馬使李君謀將兵濟河破無棣同捷兵勢日蹙廷湊不能救遣
人說魏博行營都知兵馬使刁志紹欲殺憲誠父子據其鎮乙
丑志紹作亂引所部二萬人還過魏州命諫議大夫栢耆往宣

愨且發義成河陽兵討之壬申章處厚暴薨路隨爲中書侍郎
同平章事辛巳志紹兵屯永濟

三年春正月丙戌志紹與成德合兵掠貝州詔移義成兵於禹
城中道潰叛橫海李祐誅之庚子李聽史唐合兵破志紹軍乃
北奔鎮州餘衆詣昭義降二月辛亥朔李祐率諸道兵擊破回
捷進攻德州丙辰智輿誣奏武寧捉生將石雄扇搖軍情免死
長流白州丙寅憲誠入朝請以晉內軍州聽命上令史唐攝魏
博副使改名孝章三月乙酉勅兵戈未息停教坊每日祇候樂
人夏四月戊辰李載義破滄州外城李祐拔德州同捷請降丁
亥獻俘上御興安樓受之宥其母妻及男元達等安置湖南滄
景平詔諸鎮罷兵六月辛亥轉史憲誠河中尹以晉絳李聽兼
領魏博分相魏澶三州命史孝章爲節度使甲戌魏博軍亂殺

燕誠奉牙內都知兵馬使何進滔知留後事以河北久用兵饋餉不繼秋八月壬子授進滔魏博節度使仍以相衛瀛三州歸之乙巳裴度薦李德裕爲兵部侍郎宦官助李宗閔復授同平章事壬申王廷湊因鄰道輸欵請服詔雪其罪復官爵九月辛巳勅兩軍諸司內官不許著紗縠綾羅等服戒駙馬韋處仁戴夾羅巾壬辰宗閔惡德裕逼已出爲義成軍節度使冬十月己酉沈傳師違例奏皇帝誕月請啓戒壇詔罰俸癸亥裴度辭判度支以崔元略爲戶部尚書代之十一月壬申朝獻太清宮癸巳朝享太廟甲午南郊肆赦禁止四方勿獻新樣織成衣物併焚機杼南詔自嗟顛軼君專政屢謀入寇丙申遂陷邛雅等州甲辰王智興來朝十二月丁未朔蠻逼戎州詔起荆南鄂岳襄鄧陳許等道兵赴蜀命東川郭釗兼領西川貶節度使杜元穎

邵州刺史道中使楊文端齋詔賜南詔王蒙豐佑戊午以董重質充神策西川行營都知兵馬使嗟顛自邛州引兵徑抵成都陷其外城又寇東川入梓州詔復發太原鳳翔兵赴援遣中使以國信賜嗟顛不相侵擾始詔罷兵癸酉宇文鼎爲御史中丞奏羣臣延英入對前一日進狀限在卯前

四年春正月辛卯牛僧孺來朝宗閣薦令復相戊子封皇長子永爲魯王母王氏爲昭儀二月戊午興元軍亂殺節度使李絳以左丞溫造代之三月丁丑造赴鎮以計殺新軍八百人流楊叔元康州丁酉路隨等進憲宗實錄優詔答賜錦繡銀器夏四月奚王寇幽州李截義擊破之擒其王茹羯以獻以爲右驍衛將軍五月戊子勅滅西川歲造綾羅六月丁未裴度老疾辭政命平章軍國重事三五日一入中書壬申上聞諸司刑獄多滯

詔尚書左右丞及監察御史糺舉以聞上因王守澄招權納賄不能制及先朝逆黨猶存以學士宋申錫沈厚忠謹可倚大事擢爲尚書右丞加上柱國賜紫金魚袋秋七月癸未拜同平章事密與謀誅宦官中錫請漸除其威權之逼上者乃引吏部侍郎王番爲京兆尹諭以密旨八月太原饑柳公綽奏代蔚三州山石化爲麪人取食之甲子內出綾絹三十萬匹付戶部充和糴又出三千匹賜宥州築城將士戊辰幸梨園亭會昌殿奏新樂九月壬午度復謝病罷兼侍中充山南東道節度使冬十月戊申郭釗有疾求代以李德裕爲西川節度使蜀始又安

五年春正月庚子朔積陰罷元會丁巳賜滄德軍名曰義昌庚申幽州副兵馬楊志誠作亂逐節度使李載義殺莫州刺史張慶初自稱留後牛僧孺勸上授以盧龍節度使從之二月壬辰

載義赴京拜守太保同平章事賜第於永寧里給賜優厚戊戌
王璠泄上密謀以堂帖付王守澄鄭注嗾軍虞候豆盧革誣告
申錫謀立上弟漳王守澄以聞上怒下令追捕庚子罷申錫爲
右庶子壬寅左常侍崔玄亮及諫官十四人伏闕奏所告事請
付法司鞠實上仁柔少斷答令且退伺與大臣議玄亮等泣涕
固請意稍解召牛僧孺入鄭注恐事覺勸守澄亟行貶黜癸卯
降漳王巢縣公貶申錫開州司馬士庶聞之側目夏五月戊戌
朔上朝太廟責有司不時修葺各罰俸命中使領工徒嚴禁中
修營材料葺之右補闕韋溫疏論宗廟之重非陛下所私有司
不當虛設上善其言追止中使命有司修奉宗正寺以祭器朽
敗請易之及成命陳於別殿肅儀閣視戊午德裕遣使南詔索
前所掠百姓并工匠僧道得四千人而還秋九月庚申德裕奏

吐蕃悉怛謀來降收復所陷維州乞差兵鎮守事下尚書省集百官議牛僧孺沮止詔悉還之吐蕃執悉怛謀及與偕來者誅之由是牛李怨益深冬十月戊寅南蠻寇嶺州十一月庚戌王承元來朝

六年春正月乙未朔久雪罷元會羣臣請上尊號補闕韞溫言非其時上善之而止壬子詔京畿諸縣賑恤無告兼赦囚徒夏五月庚申上聞諸道水旱疾疫相繼乃教化未感精誠未格法令或爽官吏爲非此數者皆足以傷和氣詔中外臣寮具所見聞奏上朕當親覽無憚直言有遭災疫一門盡歿者官給凶器餘據人口多少與減稅錢疫未定處官給醫藥其諸道賑賜慮有不充宜減供御及諸公用以備秋七月甲午諫議大夫王彥威戶部郎中楊漢公祠部員外郎蘇滌右補闕裴休並充史館

修撰

故事無四員並命者時多非之

八月庚午裴慶來朝九月庚寅朔初定滿

青五州兩稅額十九萬三千九百八十九貫

自此滿青始有上供辛丑涿

州置新城縣冬十二月牛僧孺罷上悔維州之事以爲失策且害德裕成功故疎之乙亥劉從諫來朝丁未李德裕入爲兵部尚書上注意甚厚

七年春正月乙丑朔御含元殿受朝賀上每愛惜物性令吳蜀貢新茶於立春後採造甲午從裴慶奏停襄州臨漢監牧民以爲便壬子京兆府賑關輔河東同華陝虢晉州各粟十萬石河南河中絳州各七萬石並以常平義倉物充二月丙戌李德裕入相夏六月壬申上宣命中書工部尚書鄭覃可御史大夫宗閔惡其不出於己心頗不樂謂崔潭峻曰一切事宜出安川中書潭峻曰八年天子亦可聽自行事矣宗閔愀然而止乙亥宗

閔遂罷王涯藉鄭注力秋七月壬寅拜同平章事領使如故已
丙早疏決繫囚閏月乙卯朔避殿減膳停音樂減廐馬芻粟百
司厨餼出宮女放鷹犬罷內外修造憂勞百姓詔下數日雨澤
霑洽人心大悅八月甲申朔開魯王永爲皇太子方從師傳詔
國子預選名儒置五經博士上患近世文士不通經術李德裕
請依楊紱議罷詩賦試帖經大義從之又詔卿大夫下人所視
遠近所做若非恭儉廉貞望其服從固不可得朕比年以來不
寶珠玉不御纖華逮于六宮皆務儉薄可叶朕此志率先兆人
自今衣服輿馬如有故違重加黜責冬十月壬辰上降誕日路
隨等請立慶成節上諭以故事僧徒道士講論於麟德殿朕不
臨聽羣臣又請上尊號會中使薛季稜自同華還言闕闕彫弊
上嘆曰關中小稔百姓尚爾况江淮比年大水民困何如朕無

術以救之政崇虛名乎因固却之

自是終帝之世無加身號唐世所無

十二月己

亥刑部詳定大理丞謝登新編格後勅成詔令頒行庚子上得風疾不能言王守澄薦鄭注善醫上飲其藥有驗由是有寵

八年春正月丁巳聖體痊平御太和殿見內臣甲子御紫宸殿

見百官丙寅攝太尉庾承宣告修太廟遷九室神主於便殿二

月壬午朔日食赦繫囚放進賦移流人夏五月己巳太廟功畢

命禮部尚書令狐楚攝太尉徧告神主復入六月甲午久旱司

門員外郎李中敏表雪宋申錫之冤上不聽遂謝病歸丙申罷

諸色選舉戊戌宰臣請依舊制讀時令秋七月辛酉雷震定陵

地裂一百三十尺詔宗正卿李仍叔啓告修塞上信李仲言堂

帖中外臣寮各舉善學周易者己亥御寫易義五道示羣臣有

明此義者三日內聞奏人皆竊笑卒無應者九月辛亥夜彗起

太微西指近郎位長丈餘西北行凡九夜越郎位西北五尺減
癸丑月入南斗己未李德裕進御臣要略及柳氏舊聞三卷庚
申王守澄宣召鄭注對於浴堂門錫錦彩銀器拜爲庫部員外
郎是夜彗出東方長三尺輝耀甚偉甲子鄭注進藥方一卷辛
巳幽州軍亂逐節度使楊志誠監軍李復佗推兵馬使史元忠
權領軍事庚寅李宗閔復相罷德裕興元尹辛卯路隨拜太子
太師皇太子見於崇明門命中使田全操充禮儀使壬辰召李
仲言對於思政殿改名訓賜緋拜爲翰林侍講學士數因進講
以微言探上意諫官交論不可給事封還勅書上令宣諭勅命
已行不可遽改庚子復詔鄭注對於太和殿所言于上無有不
從自是二人壬寅宴李訓於翰林院賜法曲弟子二十人奏樂
多節禁中以寵之丙午德裕復留十一月癸丑王廷湊卒其子元逵改父

舊轍謹奉朝廷丙子莫州軍亂逐刺史張惟況己卯楊志誠來
奔下臺訊鞠流於嶺外至商州殺之乙亥復除德裕鎮海軍節
度使不兼平章事上見其黨互相擠排長嘆息曰夫河北賊易
去朝廷黨難十二月己卯鄭注爲太僕卿賜紫金魚袋癸未命
通王領幽州節度大使史元忠爲留後己亥李逢吉致仕鄭注
李訓深德王璠共薦爲尚書左丞是歲命進士復試詩賦

九年春正月乙卯起復王元逵爲成德軍節度使癸亥巢縣公
勣追封齊王二月丁亥上從訓與注言秦地有災宜興土木復
天寶以前昇平故事以贖之乃發神策軍千五百人洵潘曲江
及昆明池建亭館三月癸卯京師地震庚午左丞庾敬休卒詔
廢朝一日丞即廢夏四月丙戌左授德裕太子賓客分司東都
以賈餗代之未行爲中書侍郎同平章事路隨罷領鎮海軍

庾子又貶德裕袁州長史辛丑大風壞舍元毀鴟吻并金吾仗
金城樓觀共四十餘所五月上以密謀告于訓注勸擢仇士良
爲左神策中尉以分守澄之權又謀逐去中尉韋元素樞密楊
承和王踐言監各邊軍戊辰以王璠爲戶部尚書判度支辛未
王涯册拜司空六月京城訛言鄭注爲上合金丹須小兒心肝
民間驚懼上聞惡之癸巳下京兆尹楊虞卿於獄貶爲虔州司
馬壬辰注求爲兩省官宗閔不許以爲明州刺史擢李固言爲
門下侍郎同平章事秋七月甲申朔以李石權京兆尹戊申填
龍首池爲鞠場曲江作紫雲樓彩霞亭內出扁額仇士良以百
戲迎于銀臺門壬子注又發宗閔交結之罪再貶虔州長史擢
所善舒元興爲御史中丞劾侍郎李漢蕭澣侍讀崔侑蘇滌郎
中張諷楊敬之皆黨宗閔各貶遠州刺史將用注爲相御史李

甘蘇特揚言白麻出必壞之會訓亦忌注獨相故事不行癸亥
貶甘封州司馬特潘州司戶甲子擢訓兵部郎中知制誥注工
部尚書充翰林侍講學士與上密謀外人莫知戊寅上幸左軍
龍首殿因幸梨園含元殿大合樂學士李珣言注姦邪不可倚
貶江州刺史丙申安置楊承和驩州韋元素象州王踐言思州
尋賜死壬寅中書舍人高元裕坐草除法官制言以醫進貶閬
州刺史上知班列之中人心恟恟皆不自保訓注復恐爲人所
搖勸下詔書應與宗閔德裕親故及門生舊吏等除已放黜外
一切不問人情稍安九月辛亥以舒元興爲刑部侍郎兼翰林
學士癸亥陳弘志伏誅丁卯注求爲鳳翔節度使李固言不肯
與罷爲興元尹乃自領之謀藉外兵戊辰慮王守澄握兵僞加
神策六軍兼十二軍注軍已已舒元興守本官訓守禮部侍郎

並同平章事天下事皆決于訓王涯等順承風旨而已白中尉
樞密以下見訓皆震懼迎拜冬十月辛巳上遣中使李好古齎
醜潛殺守澄乙酉鄭注赴鎮密謀送葬澆水命內臣中尉以下
盡從因以親兵自隨伏而殺之十一月乙巳令內養馮叔良殺
王守涓於中牟訓黨復慮事成恐注專有其功丁巳以王璠爲
太原尹郭行餘邠寧節度使戊午李石爲戶部侍郎判度支羅
立言權京兆府李孝本權御史中丞己未韓約爲左金吾大將
軍謀使行餘璠以赴鎮爲名多募部曲壯士并用金吾臺府吏
卒先期收戮一併去注壬戌上御紫宸殿韓約奏左金吾廳事
後石榴樹夜有甘露羣臣皆賀訓前勸帝宜親往以承天祉詔
許卽輦如含元殿宰相率羣臣先往還奏恐非甘露上顧仇士
良魚志弘曰豈約妄耶令帥諸宦者再驗因欲閉止諸人使無

脫士良等至左仗聞戈甲聲驚駭走還告變奉上的還官訓等率京兆邏卒御史臺從人擊宦官流血呼號百官倉皇散出士良等知上豫謀皆怨憤出不遜語上慚懼不復言宦官分遣左右神策軍誅王涯賈餗舒元興李訓及王璠郭行餘鄭注羅立言李孝本韓約等皆族滅之京師大震流血塗地癸亥鄭覃李石各守木官並同平章事丁卯左神策大將軍陳君奕爲鳳翔節度使戊辰給事中李翊爲御史中丞仇士良魚志弘並兼神策上將軍宦官氣益盛迫脇天子陵暴朝士生殺除拜皆決于北司中書行文書而已十二月壬申朔令狐楚兼諸道鹽鐵轉運使奏停榷茶張仲方權京兆尹庚辰上御紫宸問宰相坊市之間人漸安未李石奏旬日始安又與鄭覃言朕觀今日之事往往憤氣填膺甲申罷曲江亭館丁亥赦逆人親黨并諸司官脇

從及誑誤者他人無得相告有亡匿勿復追捕時禁軍暴橫仲
方不能止出爲華州防禦使以司農卿薛元賞代之杖殺神威
將一人方始少戢

開成元年春正月辛丑朔大赦改元放京兆租賦停四節進奉
禁天下宜崇營造李石勅上須內留赦書一本時看之待十道
黜陟使發日督付令與外長史著實舉行方盡利害之實丙辰
詔復楊承和韋元素王踐言崔潭峻等官爵聽其歸葬名選內
侍田全操等六人二月乙亥京師地震丙申天德軍奏吐谷渾
部落三千帳詣豐州降三月庚申幸龍首池觀內人賽雨因賦
暮春喜雨詩時朝野日憂喪亂貽義劉從諫上表欲請君側士
良聞之惕懼上及宰相差以自強夏四月庚午朔詔收復爲訓
注所黜者以鄭幹爲左丞李紳爲河南尹宗閔衡州司馬德裕

滁州刺史珽賓客分司甲午李回言復相李石判度支兼諸道
鹽鐵轉運使五月癸卯歸融爲御史中丞上自甘露變後忽忽
不樂兩軍毬鞠之會十減六七則嘗預宴音伎雜遝未始解顏
立心恥爲凡主每與宰相論天下事退或徘徊眺望獨語嘆息
李石勸曰爲理者不可速成方今內外之臣尚多疑阻願陛下
更以寬恕御之上曰今後但飲醇酒求醉天下勢實未易行石
謝以爲皆臣等之罪丙寅昭義奏開夷儀山路通太原晉州閏
月己丑湖南觀察使盧周仁進羨餘不受還之使貸貧下戶征
稅秋七月甲午京城訛言寇至詔守皇城門金吾大將軍陳君
賞閉門惡少皆望門閉卽行剽掠賴鎮重而止拜爲平盧節度
使丙申盧周仁復進羨餘中丞歸融劾以違制進奉詔於河陰
收貯八月甲戌前鄭坊節度蕭洪詐稱太后弟長流驩州戊申

聞人蕭本復詐稱皇太后親弟以爲右贊善大夫九月庚辰追復宋申錫官爵錄其子慎徽爲成固尉

二年春正月庚申戶部侍郎判度支王彥威進所撰度支占額并供軍圖又上唐典七十卷起武德終永貞二月丙午至三月戊辰夜彗出東方由氏房歷女虛危至張十四度初長七尺漸丈餘至二丈廣三尺後長五丈岐分兩尾至六丈尾無岐極長八丈凡二十三日而滅上避殿減膳分御厨食料一日以充十日放宣徽院法曲樂官五坊鷹犬出女妓令歸家壬申釋流已下罪免諸州水旱租稅停中外修造自今中外臣寮更不得上表請加徽號各令上封極言得失每御便殿舉三澣衣以示羣臣夏四月戊戌授陳夷行工部侍郎同平章事六月庚子李石奏定選格請加置吏部南曹郎中一人從之丙午河陽軍亂遂

節度使李泳本長安市民賂中官貪殘不法貶爲澧州長史左
金吾將軍李執方代之秋七月癸亥侍讀韋溫以諫太子不行
懇辭詔復爲給事中甲申太府卿張買爲兗海觀察使朝辭上
謂曰聞卿好博恐有所妨中外聞者皆爲悚息乙酉澤潞淄青
滄德兗海河南等府鎮並奏蝗旱各遣使巡覆巳丑大雨羣臣
表賀振武奏党項并突厥各入剽掠節度使劉沔擊退之八月
丁丑彗復出虛危之間庚戌冊太子母昭儀王氏德妃昭容楊
氏賢妃封敬宗子休復梁王執中襄王言揚汜王成美陳王皇
子宗儉蔣王時德妃無寵楊賢妃譖死因併譖太子禍起于此
甲申慶成節上幸十六宅與諸王宴樂停延英殿奉觴罷置齋
筵集僧衆禁屠宰冬十月戊戌詔賜嘉王巡循王通通王諶光
祿大夫檢校司空上柱國及安王溶親王溥並依百官例給料

錢鄭覃奏進石壁九經刊碑列于太學戊申李固言罷楊嗣復爲戶部尚書充諸道鹽鐵轉運使十一月乙丑京師地震己丑契丹朝貢上復故事每入閣左右史執筆立於螭頭之下備書君臣論奏故開成政事最詳於近代

三年春正月甲子宰相李石被盜傷求索不獲累表辭位上不
得已罷爲江陵尹是日早朝常參官祇九人乙卯加贈齊王
懷懿太子戊申李固言薦所善楊嗣復李珣並以本官同平章
事領使如故嗣復欲援李宗閔恐覃不從先令宦官導意二月
乙未上語宗閔在外數年可別與一官覃夷行不可嗣復珣曰
太和末宗閔德裕同時得罪二年之間德裕再移宗閔尚在貶
所上乃命與一郡丁酉轉宗閔杭州刺史庚子吏部奏罷長定
選格夏四月辛卯詔戶部侍郎崔龜從判本司事今後先授上

者加帶平章事癸丑屯田郎中李衢河王府長史林贊等進所
修皇唐玉牒五月河中奏駟虞見百官稱賀上語判度支杜棕
昔李訓鄭注皆因祥瑞以售其奸乃知所奏未必爲國之慶卿
曩在鳳翔不奏祥瑞真先覺也卽下詔禁止六月癸丑上以幣
輕錢重問於宰相嗣復對曰此事已久不可遽變恐徒擾人但
禁銅器斯得其要秋八月甲午河南山南湖廣諸州大水魏博
六州大蝗遣給事中盧弘宣刑部郎中崔璿各宣慰流民九月
壬戌皇太子慢遊敗度上欲廢之以狄兼謨垂涕諫止乃詔侍
讀竇宗直隔日進講移居少陽院殺宮人并左右數十戊辰却
歸梁王等五人於十六宅辛未義武張璠卒子元益舉族歸朝
命代以易州刺史李仲遷軍士不納宰相議發兵致討上以易
定地狹民貧軍資半仰度支且璠在鎮十五年爲幽鎮所憚但

令謹備四境無何除元益代州刺史軍中果有異議放之出境
乃轉蔡州韓威入之自開成來神策將吏遷官多不問奏上詔
自今以始皆先聞狀至中書然後檢勘施行冬十月庚子皇太
子暴薨乙巳左金吾將軍郭收爲邠寧節度使上問柳公權近
來外議何如對曰風聞陛下納收二女故授方鎮帝俛首良久
卽命遣還是夜彗起軫長三丈東西指十一月乙卯朔東西竟
天詔釋諸道繫囚免水蝗租稅加以存撫賑給十二月辛丑裴
度以疾求歸東都詔復入知政事遣中使敦諭上道丙午鄭畀
累表辭位三五日一至中書

四年春閏正月己亥度至京以疾不能入見上令中官就第勞
問三月丙戌薨夏五月丁亥上於閣內問宰臣新修開元政要
如何嗣復對曰臣等未見緣玄宗政事前後大有不同陛下欲

傳示子孫請先付臣等參定可否鄭覃進曰陛下開成元年二年政事殊美三年四年漸不如前嗣復曰前二年覃與夷行用事後二年臣與珏同之罪皆在臣因叩頭趨出上遣中使召還勞之曰鄭覃失言陳夷行又言不宜使威權下移李珏曰今宰相中誰敢弄陛下威權者亦求退丙申罷覃守右僕射夷行吏部侍郎六月庚申上幸安王并頴王院宴樂厚賜與之戊辰早天平魏博易定管內蝗分命祠禱上每憂動於色對宰臣若三日不雨當退歸南內更選賢明以主天下宰臣嗚咽流涕各請策免是夜大雨秋七月庚辰朔西蜀滄景淄青又奏大水甲辰崔郾以本官同平章事八月辛未夜流星出羽林尾長八十餘尺滅後有聲如雷壬申鎮冀四州蝗食野草樹葉皆盡冬十月乙卯上就起居舍人魏謩欲觀起居注謩曰陛下但力於爲善

不必觀史上曰朕向嘗觀之暮以爲前者史臣之失臣則不可
乃止丙寅立敬宗子陳王成美爲皇太子因悼惜前太子永非
命殺教坊劉楚材宮人張十十等自是舊疾增劇十二月乙卯
乾陵火辛酉百寮赴延英殿起居乙亥疾少間御思政殿宰臣
入謁名當直學士周墀問曰朕可方前代何主對曰堯舜之主
上曰朕所以問卿謂何如周赧漢獻耳墀驚曰何至是耶上曰
昔之赧獻受制強臣今朕受制家奴以此言之殆不如也因泣
下沾襟自此不復視朝是歲戶部計見管戶四百九十九萬六
千七百五十二較之天寶盛時甫及其半

五年春正月戊寅朔不受朝賀辛巳帝崩於大明宮之太和殿
越十日辛卯始大斂成服享年三十三在位十五年諡曰元聖
昭獻皇帝廟號文宗

刪日文以自持儉德夙成獻以自考不近虛名疎於遠略
欲速不速匪人乘之元氣益索獨憐繼體成敗在天數理
莫逃大運終焉度以老辭黃以直捐天耶人耶其然豈然